

四庫全書

集部

欽定四庫全書

宋詩紀事卷五十

錢塘厲鶚撰

陸永仲

永仲字維之一名凝之字子才餘杭人隱大滌洞天石室因以石室稱之有石室集

四朝聞見錄光堯嘗幸大滌憲聖亦侍進主觀者問以山中詩客以維之對進其行卷光堯讀之太息曰布衣入翰林可也憲聖曰山林隱士不要人知要他出山卻是苦他遂止

西湖志餘永仲少與計偕入汴羣法徒邀令雜坐命道人相之道人指永仲曰秀才問以科第

曰且還山及別道人以粒丹授之曰緩急用之
永仲下第循汴而歸怒濤大作以丹投之風浪
恬息岸有呼永仲姓名者則道人也遂出家隱
大滌山

洞霄宮

天柱峯前古洞霄我生來此避塵囂半牀明月琴三弄
四座青山酒一瓢當戶老松如對立隔花啼鳥似相招
斷金一去無消息唯有寒梅共寂寥

洞霄詩集

絕筆

岳南之館白雲端鳳笛龍簫徹廣寒一鶴曉飛沖碧落

羣仙笑倚玉闌干

咸淳臨安志

駱適正

西園席上記事

花隨春盡覓無痕尚續餘歡侑素尊一曲未終人已去
西園燈火欲黃昏

清波雜志輝居建康春晚赴張德共會於西園
呼妓侑酒酒酣忽有傳府命呼其人時張安國
開府方兩日其人臨去求自解之說衆但以實
告況社中二客不至必留鈴齋翌日詢之如所
料焉歌者既去坐客駱適正即席賦詩云云

劉博文

博文字元素宣城人

柳眼

青眼初垂已可知精神渾在豔陽時只因嫁得東君後
兩淚相看是別離

竹坡詩話元素内子朱賢善事其夫一日元素
與客飲分韻得柳眼詩成坐客皆不悅後數日
而其妻亡蓋詩識也

劉棐

裴字仲忱

咸陽

父老壺漿迓義旗秦亡誰復為秦悲
不曾被虐曾蒙德
十二金人各淚垂

玉殿珠樓二世中楚人一炬逐煙空
卻緣火是秦人火
只與焚書一樣紅

墨莊漫錄詩律殊有風致類唐人題詠他詩亦稱是

劉敬

觀滄浪亭石感而有作

蘇君在朝人不知蘇君既沒人悲之流風遺書見稱道
高文大句爭提撕壁間草隸亦不置剥苔椎土無棄遺
乃知死不與人共利害而後不為時所疑滄浪亭空卉
木老古石蒼蒼顏色好無脛猶疑千里來致身忽在都
門道帝都王侯好事多相看自悔取不早君不見吳興
長史春欄衫閉門抱恨長枯槁

吳郡志

薛揚祖

揚祖字元祖鄞人歷知漳州召為大理丞

與張樞密話舊作

羸軀苦善病日與藥裏親藉彼參苓功扶此憂患身思
君若飢渴相憐同病人余身本蒲柳寧竢秋風晨君誠
松柏姿何患不長春容面一若丹鬢髮一若銀來日安
可期往事曷足陳不能罄君壘奚以浣我塵吹笙將鼓
瑟慚余非嘉賓

甬上耆舊集

薛居實

居實字去華鄞人朋龜子歷官淮東安撫使直
祕閣有集

皇太后挽歌

夾日光先業寒星聚夜臺慈名千古重哀詔九天來地
底雞人少雲中鶴使催宮門芳草徧從此不須開

老妓自稱汴京宮人泣而贈之

薄妝自斂老深宮一曲悲歌聽不終黑髮尚霑梁苑雪
素衣還帶上林風殘春柳葉蕭條綠破國桃花冷落紅

收拾琵琶蹙眉黛教人同在淚痕中

以上兩上者舊集

仲昂

昂字明舉紹興中廣漢人

題西門外笮橋下觀音院

雨砌風亭長綠苔壁間題字半塵埃城南蕭寺無人跡

幾度曾因送客來

全蜀藝文志

何錫汝

錫汝紹興間人

玉虹泉

在羅田縣東五十里詩刻石上

百尺雲巖佛閣前晚鐘疎葉思悠然岸邊酌酒和清露
石上題詩染翠煙半嶺泉鳴通古澗數峯秋盡隔寒川
西風似欲吹人起去逐騎鯨汗漫仙

湖廣總志

劉望之

望之蜀人自號觀堂

新都驛遠平軒

霜晴木落送歸鞍袖手微吟此慰顏
賸欲憑欄招白鳥

更煩翦樹出青山晚悲薄祿非三釜賴許清詩見一斑

自注軒有外氏周
次元帥蜀時詩

看到遠平纔得恨我寧僵卧尺椽間

沱江

尚勝三年謫終慙萬里馴極知行路澀可忍在家貧歲
晚沱江綠雲深錦樹新相思宵如月夜夜只隨人

發成都

落拓平生載酒行如今憔悴鬢絲生無金得買青樓笑
空負閒愁出錦城

以上成都文類

紹興中作

一紙盟書換戰塵萬方呼舞卻霑巾
崇陵訪沈空遺恨
郢國憐懷尚有人收拾金繒煩廟算
安排鐘鼎頌宗臣
小儒何敢知機事終望君王赦奉春

程史紹興中和議成蜀士劉望之作詩云云時
語禁未大嚴無以為風者望之它詩多誦秦檜
所謂奉春不知指何人也

白
麋

合江探梅

艇子飄搖喚不回半溪清影漾疎梅有人隔岸頻招手
和月和霜翦取來

成都文類

任續

續紹興間人

還珠洞呈桂林帥呂叔恭

山林自空閒遊人事幽討岫幌與雲關來蹟可堪掃艮
離矗孤峯玉簪倚天杪桂水流瀰碧洄伏皆縈繞豁訝
巖穴深蚪龍雙夭矯坤倪露幽祕造化殫奇巧勝槩絕

塵寰髣髴蓬萊島悠悠世俗情是非苦膠擾水中蠅何
罪徒勞卹心悄人厄困無妄礫石埋深窈風月幾年恨
山光慘蘿蒿星郎太嶽孫長城隱南表戎旃整且暇高
情恣登眺郊坰擁小隊一見顏色愀舊觀俄頃復洞戶
天重曉傷心日月過人世幾番老山川不相似歲月依
然好呂巖標強名往事人能道孟公漫驚坐子夏冠非
小桃符錄餘慶邨勝成濮兆冥數今乃驗常幸定誰考
哦詩記貞石則有若樽醪

桂勝

强彦文

彦文溧陽丞

句

空有青山自龍虎
可堪荒冢更衣冠

金陵道中

遠山初見

疑無路曲徑徐行漸有村

船中燈火十年話枕上江

湖萬里心

清波別志

李璜

璜字德劬江都人流寓四明有槩菴集

樓大防序云德劬少負雋才耻從進士舉後寓
四明蕭散骸髀以終其身不娶無子晚從宏智
禪師于言下有省寫照自題其上云分明便是
龐居士又卻無人賣罩籬不可謂無所得然亦
可哀也已

以二貓送張子賢

家家入雪白於霜更有敬鞍似鬧裝便請爐邊叉手坐
從他鼠子自跳梁

銜蟬毛色白勝酥搦絮堆綿亦不如老病毗邪須減口

從今休歎食無魚

墨莊漫錄

唐 慙

慙字端仲淮海張邦基之表舅

賦漢建安時侯印

關中金印豈秦關想見風流漢已還
大饗似書譙縣石
蘭亭寧數會稽山
空餘此日歸囊橐
曾是當年雜佩環
萬戶況將取如斗
此章何足繫腰間

題宗室趙大年橫卷為張邦基作

聞君新得小山川
畫手來從郤雍賢
不學農夫馬用稼

若為王子豈知田我真壠上躬耕客親見人間小隱天
始識何年京樣熟菊籬寧似景龍邊

菊籬景龍門下景也

墨莊漫錄米南宮謂大年作畫清麗雪景類王維汀渚水鳥有江湖意予嘗得大年所作橫卷歸田圖竹籬茅舍煙林蔽虧遙岑遠水咫尺千里葭蕕鷗鷺宛若江鄉表舅唐端仲題詩云云

裴相如

相如號豹隱餘杭人

遊洞霄宮

人間三十六洞天各有邃道通神仙茲山九鎖路曲折

中間五洞棲雲煙東遊大滌望天柱西登石室觀飛泉
窮幽討勝足未倦明月忽墮青崖顛山中道士借一榻
夜半猿鶴驚人眠明朝又復出山去白雲回首空淒然

洞霄詩集

龔明之

明之字熙仲崑山人祖母李病且革明之禱于
天乞減五齡以益李壽灼頂聞腦中有爆裂聲
不為動李病尋愈竟五年卒明之以特恩廷試

授高州文學年老敕監潭州衡嶽致仕超授宣
教郎著中吳紀聞

芝華亭

誰道休祥繫上穹民心元自與天通政平訟理為真瑞
何必金芝產梵宮

玉峯詩纂

蘇籀

籀字仲滋轍之孫遲之子官至監丞南渡居婺

州有雙溪集

薜蘿

葉葉秋聲中
霏霏蚤英藪
介特有如松
繁華匪慙菊
勃蔚襲軒墀
薰霑滿衣服
情人擢纖指
拾藥動盈匊
薜蘿見離騷
苓藿入譜錄

遊鼓山

自注孫子安見招

呼船起柁乘潮平
掠窗飄箔疎雨傾
漱石枕流東道主
櫛風沐雨吾曹行
百尋懸瀑瀉紳佩
兩邊喬木翔枅甍
乞漿滿甌牛乳粥
縱橫下筯駝蹄羹
躋摩頂踵歷磴術

牽挽葛藟披荆榛荒浪攬差復奄靄截薜蘿仍棱層
嗶煙嘯雨猿鶴宅絕山航海樵漁能草衣穴處避世士
木食澗飲安禪僧芝房雲閣無盡藏月屏風幌長明燈
笑看闌闌一蟻垤揮斥氛祲投蠻藤經行石竇解滕屨
飲灌匏杓談淄澠莫嗔踏碎蒼苔色莫嫌汲濁陰井清
膏肓泉石有裁鑒騰蹕巖嶠試股肱要識石鼓真面目
立置枕几非繪繒風吹楊葉此山下欲問故老知誰謦
市朝一夢爭奪際山海蕭散堪伏膺

和卷中韓子蒼梅花

先開媚晴昊孤豔斷魂時繞樹沈煙度凌寒檀暈披參
橫明月觀雪細影娥池結實冥冥雨君看雀啁枝

以上雙溪

集

蘇簡

簡字伯業菑弟有山堂集

次韻張正民遊智者寺

養拙何所詣白晝門常關剝啄有好懷遶郭橫秋山佛

刹在山麓清淨非人間
曳杖得晤語幽尋為歡顏
寺同喬木古僧與白雲閒
一鳥不復鳴流泉自潺湲
山林作勝踐世事羊腸艱

金華詩粹

吳璋

璋沆子

環溪夜坐

江天閒晚已斜陽
靜倚柴門對草堂
葉落轉枝翻鵲影
星飛橫水帶螢光
微風得雋驅殘暑
新月出奇生嫩涼

坐覺秋容轉清爽一聲漁笛在滄浪

句

惜別有情空執手贈行無緒不成章
閒中坐作蜘蛛

隱夢裏逃成燕雀禪奕碁但以忘憂耳
縱酒無如作

病何以上環溪詩話

胡仔

仔字元任舜陟子仕為晉陵令卜居吳興號茗

溪漁隱著有叢話

苔溪絕句

三間水閣賈耘老一首佳詞沈會宗無限當時好風月
如今總屬績溪翁

苔溪漁隱叢話賈耘老舊有水閣在苔溪之上
景物清曠東坡作守時屢過之題詩畫竹於壁
間沈會宗又為賦小詞其後水閣屢易主今已
摧毀久矣遺址正與予小閣相近同在一岸景
物悉如會宗之詞故予嘗有句云云

春寒

小院春寒閉寂寥杏花枝上雨瀟瀟
午窗歸夢無人喚

銀葉龍涎香漸消

茗溪漁隱叢話西清詩話云長沙徐仲雅宮詞
曰內人曉起怯春寒輕揭珠簾看牡丹一把柳
絲收不盡和風搭在玉闌干其富貴瀟灑可愛
余嘗作春寒絕句云云聊效其體也

對月用促句換韻格

青玻璃色瑩長空爛銀盤挂屋山東晚涼徐度一襟風
天分風月相管領對之技癢誰能忍吟哦自恨詩才窘
埽寬露坐發興新浮蛆琰琰拋青春不妨舉醖成三人
題茗溪漁隱圖

余卜居苕溪上日以漁釣自適因自稱曰苕溪漁隱
臨流有屋數椽亦以此命名僧了宗善墨戲落筆頗
瀟灑為余作苕溪漁隱圖覽景攄懷時有鄙句皆題
之左方云

溪邊短短長長柳波上來來去去船鷗鳥近人渾不畏
一雙飛下鏡中天

秋雲漠漠煙蒼蒼蘆花初白蓮葉黃釣船盡日來往處
南村北村杭稻香

卷起綸竿撒櫂歸短篷斜掩宿漁磯日高春睡無人喚
撩亂楊花繞夢飛

和人七夕

乞巧筵開玉露秋一鉤涼月挂西樓人間百巧方無奈
寄語天孫好罷休

以上苕溪漁隱叢話

左 鄱

題湘中郵亭壁

疊疊山腰繫冷雲疎疎雨腳弄黃昏松聲更帶溪聲急

不是行人也斷魂

苔溪漁隱叢話

賴 鑄

鑄字成之號竹莊

送鄭居之

窗前落葉正蕭蕭夜雨寒燈共寂寥君是居人余是客

明朝相候合江橋

詩家鼎鑪

龔 相

相字聖任處州遂昌人兵部侍郎原之孫知華

亭縣遂家吳中

濡須塢

在巢縣東南

南北安危限兩關
迅流一去幾時還
淒涼千古干戈地

春水方生鷗自閒

方輿勝覽

邵博

博字公濟伯溫子有西山集

題智永上人瀟湘夜雨圖

曾擬扁舟湘水西
夜窗聽雨數歸期
歸來偶對高人畫

卻憶當年夜雨時

畫繼

題相如琴臺

長卿本豪傑禮外安可處手彈南風琴心謂東鄰女雜
身傭保中初不忌笑侮大者固已立下此皆可補三賦
爭日星一書起今古其餘不自祕輒為人所取兒曹爾
何知杯酒那可汙故臺已丘墟勝絕誰敢據我來訪遺
跡低回不忍去詩成欲叫君雲車隔煙霧

成都文類

雲安下巖偶成

輕波颭鴨頭小艇翔燕尾風沙三十程雲水一千里雪
盡晚寒輕日長春睡美汀蕪翹碧茅岸樹裏紅蘂江浮
清鏡中山入翠屏裏蜀鳥已驚心巴猿猶側耳竹節數
名灘桃花驗新水谷鶯歌尚慵檣燕舞何喜落日浪鎔
金殘花風翦綺斯遊興最多了不知行止

全蜀藝文志

王汶

汶字希道一字道原汝陰人回之子有詩集雪
溪王鉅序之

寄韓澗泉

在困多促促長懷特棲者崔嵬玉山岑其誰秣余馬朝
隨澗雲浮暮逐澗泉瀉光儀儼神交晤言冀心寫食魚
不知肥采菊不盈把願垂白日影照我茆屋下

送應顯夫之上饒

細雨杏花斑飛飛燕子還人隨煙櫂去門對釣磯閒曉
月偏驚夢春雲不離山定知多好句音問盍相關

以上
前賢

張子文

墨梅二絕

筆端喚醒玉梅魂
滿袖春風不見痕
未許卷簾新月上
卻教煙雨惱黃昏

憶昨江湖倒載歸
暗香夾路雨霏微
誰人貌得春風景
遠看如煙近卻非

次韻秦會之題墨梅

南枝春色弄微溫
記得清香撲酒尊
今日相逢隔煙霧

揚州殘夢足銷魂

以上聲畫集

陸士規

黃陵廟

東風吹草綠離離路入黃陵古廟西
帝子不知春又去
亂山無主鷓鴣啼

鶴林玉露陸士規布衣工詩秦檜喜之嘗挾秦書干臨川守餽遺不滿意升堂嫚罵守懼以書白秦自解秦怒陸甚陸請見不出然猶令其子小相者見之問其近作陸誦黃陵廟一絕小相入誦之秦吟賞再四即接見待之如初

周必大

必大字子充一字洪道廬陵人紹興二十一年
進士中宏詞科權中書舍人孝宗朝歷右丞相
拜少保進益國公寧宗朝以少傅致仕卒贈太

師諡文忠有平園集

鶚按宋史必大紹興二十年進士据咸淳臨安志紹

興二十一年趙逵榜無二十年榜宋史誤也今
訂正

賞心亭醵會

晉人誇新亭暇日輒高會中間伯仁輩未免楚囚對江

山猶古昔人物已曖昧東郊今保釐翠華記行在佳麗
壓淮楚迢遞盛冠蓋茲樓貫城雉于邁無小大令威雖
不歸靈光故無礙煙雲互明滅川郭相映帶當年烏衣
遊此日思勝槩從容值休沐登臨多慷慨幽懷忽軒豁
細故絕芥蒂已尋詩社盟更訂飲朋戒嘉賓滿坐上好
詩來天外舟移白鷺遠目送飛鳥快方種淵明秫麴免
監河貸一醉儻可期與君時倒載

遊茅山道中口占須徧遊乃成章

千峯溧陽來勢若西南奔遙拱三茅峯不敢迫至尊三
茅如軒懸次序儼弟昆正西闢夷途羣仙之所門至今
下泊宮往往弭旗旛

過池州作

千古風流杜牧之詩材猶及杜筠兒向來稍喜唐風集

原注荀鶴詩
集名唐風集今悟樊川是父師

二老堂詩話池陽集載牧之守郡時有妾懷妊
而出之以嫁州人杜筠後生子即荀鶴也

高宗皇帝挽詞

社稷興中否干戈靜四溟生年同藝祖慶壽似慈寧人
憶庚庚兆天傾九九齡向來懷夏禹今祔越山青

太極乾元父清都大帝宮宴酣忘御駿仙去任遺弓音
過堯仁遠旻號舜孝隆孤臣臺閣舊淚血灑春風

會同年楊謹仲周孟覺賞芍藥嘗櫻桃次謹仲韻

清晨自掃落花廳小甕新筍竹葉青簪盃莫辭過陋巷

臚傳相與記彤廷階翻紅藥曾重見

僕兩直
西掖

敕賜朱櫻

亦屢經老去飄零無此夢詩來吟咏有餘馨

題九華化成峯

攀蘿度險捷猿援石角鉤衣屨盡穿莫訝遠尋金地藏
也曾徐步玉階前

贈棲賢寺藏主可昇

與予同庚

我比同年百不能只餘霜鬢媿師兄殷勤覓句無言說
共撥寒灰聽水聲

以上省齋文素

元宵煮浮圓子前輩似未嘗賦此坐間成四韻

今夕知何夕團圓事事同湯官循舊味竈婢詫新功星

燦烏雲裏珠浮濁水中歲時編雜詠附此說家風

訪誠齋

楊監全勝賀監家賜湖豈比賜書華回環自闢三三徑
頃刻能開七七花門外有田供伏臘望中無處不煙霞
卻慙下客非摩詰無畫無詩只謾誇

以上平園續橐

鶴林玉露慶元間周益公以宰相退休誠齋以
祕書監退休益公嘗訪誠齋於南溪之上留詩
云云誠齋和云相國來臨處士家山間草木也
光華高軒行李能過李小队尋花到浣花留贈
新詩光奪月端令老子氣成霞未論藏去傳詒
厥拈向田夫野老誇好事者繪以為圖

蕭德藻

德藻字東夫閩人紹興二十一年進士嘗令烏程後遂家焉所居屏山自號千巖老人有千巖擇豪

楊誠齋序近世詩人若范石湖之清新尤梁溪之平澹陸放翁之敷腴蕭千巖之工致皆余所畏也

采蓮曲

清曉去采蓮蓮花帶露鮮溪長須急槳不是趁前船

相隨不覺遠直到暮煙中恐嗔歸得晚今日打頭風

後村

詩話

古梅二首

湘妃危立凍蛟脊海月冷挂珊瑚枝醜怪驚人能嫵媚
斷魂只有曉寒知

百千年蘚著枯樹三兩點春供老枝絕壁笛聲那得到
只愁斜日凍蜂知

詠虞美人草

魯公死後一坏荒誰與竿頭薦一觴妾願得生墳土上

日翻舞袖向君王

以上全芳備祖

呂公洞

復此經過三十年唯應巖谷故依然城南老樹朽為土
簷外稚松青拂天枕上功名祇擾擾指端變化又玄玄
刀圭乞與起衰病稽首秋空一劍仙

賓退錄

次韻傅惟肖

竹根蟋蟀太多事喚得秋來籬落間又過暑天如許久

未償詩債若為顏肝腸與世苦相反巖壑嗔人不早還
八月放船飛樣去蘆花叢外數青山

登岳陽樓

不作蒼茫去真成浪蕩遊三年夜郎客一柁洞庭秋得
句鷺飛處看山天盡頭猶嫌未奇絕更上岳陽樓

以上瀛奎

律髓

句

乾坤生長我貧病怨尤誰
秋浩蕩中遙指點一螺許

是定王城 稚子推窗窺過雁數峯垂隙入西窗 秋

陽直為田家計饒得漁村一抹紅

後村詩話

查 籥

籥字元章海陵人紹興辛未進士乾道中戶部

郎中總領四川財賦司

題臥龍山

山顛祠貌儼丹青千載懷人為一登隱隱故營連白帝
茫茫恨水向西陵石根蘭芷香無價雲頂松杉翠作層

人事天機古難料詩成試語定中僧

全蜀藝文志

萬州湖灘寄王夔州

十朋

滿目暮山平遠一池雲錦清酣忽有鐘聲林際直疑夢

到江南

王梅溪集附

郭知運

知運字次張鹽官人弱冠登紹興二十一年進士秦檜強與為姻知運勿樂訖停昏焉仕至荊州守倦求祿仕自號息菴老人卜居雙廟之西

有猥橐

題雙廟

唐祚中不振羣胡恣姦驕君德弗克終治亂在一朝渠
魁睥神器四海俱動搖向來為厲階其迹已冰消中興
功孰甚張許冠百僚堂堂二公烈千古名不凋義膽極
華岳忠肝齊斗杓平生慕節義卜居祠匪遙丹青就湮
鬱古屋風蕭蕭英靈如可問激懦討昏妖

咸淳臨安志

林 桷

桷字子長一字景安長溪人紹興二十一年進士秦燬之壻官右司郎中有橫堂小集

太白五松書院

翰林最愛五松山嘗說千年未擬還而我抗塵良自媿
來遊祇得片時間

池州府志

方汝疆

汝疆字南夫繁昌人紹興二十一年進士

江上晚行

疎雲薄日冷吳江江色蘆花共渺茫
四五點山煙靄淡
兩三枝槳水雲長
遊魚避網驚微浪
幽鷺窺汀下夕陽
興罷歸來更回首
滿身明月踏溪霜

舟行

平林漠漠暝煙齊
竹樹蕭森望眼迷
相喚幾聲何處雁
斷霞明處一行低

以上太平府志

陳居仁

居仁字安行莆田人家明州紹興二十一年進

士孝宗朝累官中書舍人華文殿直學士提舉
太平興國宮卒諡文懿

西湖感舊

蘇公隄畔采蓮船
蘸碧樓臺動管弦
山色湖光宛如昔
心情不似十年前

咸淳臨安志

史正志

正志字志道江都人紹興二十一年進士累除
司農丞孝宗朝仕至右文殿修撰知靖江府歸

老姑蘇號吳門老圃

新亭

龍盤虎踞阻江流割據由來起仲謀從此但誇佳麗地
不知西北有神州

忽枉王人六轡馳新亭有酒便同持坐中不作南冠歎
江左夷吾是素期

景定建康志

宋翔

翔字子飛建陽人紹興二十一年進士官湖南

安撫參議有梅谷集

紹興樂府

時韋太后歸慈寧宮

天意回皇母歸戢烽燧敞宮闈朝陽赫奕明鞠衣惟皇
之孝惟母之慈陳仙仗薦壽卮從之冢后與庶妃奏之
一作九成與咸池沓珍瑞駢福祺山陬水裔咸熙熙惟
天之相與帝之宜千萬年無窮期

建陽縣志

程大昌

大昌字泰之休寧人紹興二十一年進士孝宗

朝官至權吏部尚書龍圖閣直學士卒諡文簡
有集

宿直後出玉堂留詩示周子充

抖擻身章卻冒塵
褻䟽顧影也逡巡
鑾坡寓宿非其地
蓮燭操文自有真

關

直由來同古語
位高兼復見今人

迎潮有諾無輕爽
季老當年不諉貧

玉堂雜記淳熙丙申八月庚辰德壽宮遣大璫
張去為至都堂傳旨立翟貴妃為今上皇后明
日午後執政奏事皇后歸姓謝氏乙酉晚快行
家來宣鎖院是日侍講刑部侍郎程泰之已宿

直呼馬而出予至內前適與之遇秦之揚鞭云
留詩案上矣

和劉侍郎夔九日登女郎臺

霜枝凋翠雁橫秋莫倚危樓動旅愁菊有清香樽有酒

茱萸不插也風流

能改齋漫錄

次韻陸務觀海棠

喚回殘睡強矜持淺破朱脣倚笛吹千古妖妍磨不盡

長隨春色上花枝

海棠譜

句

戲作風枝斜再惱玉堂宿

題洪內翰侍兒翠翹畫竹
圖繪寶鑑

劉知過

知過字與機天台人未冠領鄉薦紹興二十一年中特科監南嶽廟與弟知變俱以文名尤工于詩參政賀允中題其詩曰江東天籟

春日

濃起香塵十里晴晚來煙雨忽斜橫
花開花落清明候
山北山南杜宇聲
追念舊遊渾似夢
退思良計不如耕

人中喜有彌天釋時吐清文慰此情

台州府志

秦 熺

熺字伯陽本檜妻兄王暎孽子檜乞養為後紹興二十一年進士累官翰林學士知樞密院事進少師致仕

齊東野語熺本王氏子檜素不悅檜畏內妾嘗孕其妻逐之生子為仙遊林氏子曰一飛以檜故仕至侍郎兼給事中曹泳嘗勸檜還一飛未果而檜死

送舅氏知湖州

暫別甘泉豹尾中
隼旗仍駐水晶宮
文昌地禁論詩少
燕寢凝香簿
領空可但龔黃宜
共理便應顏謝與
同風
飽聞回老榴皮事
試問溪頭鶴髮翁

雲麓漫鈔說者謂呂仙嘗到湖之東林訪沈東老留詩既而登東林寺于壁間以榴皮自畫其像人初不知及秦伯陽送舅氏王亨道知湖州詩出觀者如堵

林之奇

之奇字少穎福州候官人
紹興二十一年進士
尉長汀召為校書郎以病除
太宗正丞提舉本

路市舶再任本路參議官終朝奉郎有拙齋集

新晴山月

日瑄按宋文鑑作文同

高松漏疎月落影如畫地徘徊愛其下夜久不能寐怯
風池荷卷病雨山果墜誰伴余苦吟滿林啼絡緯

江月圖

冥冥一月輪不知水與天獨于顥氣中仰見素璧圓超
然狂道士起視清夜闌自拈白玉笛吹此江月寒想當
萬籟息逸響流空煙我從江海來形留意先還何當買

漁蓬追此水月仙

早春偶題

寒風浙瀝鳴枯葦小鴨熏殘猶未起更教細雨結輕寒
坐聽蕭蕭打窗紙石盆春蒲已抽翠雕斛栽花未生紫
擁爐閉閣賦幽香未怕春冰生硯水

以上拙齋集

黃巨澄

巨澄餘姚人紹興二十一年進士官吏部侍郎

登四明山

會稽東南秀四明名更佳蜿蜒三百里慘淡青蓮花伊
昔天地初山川始萌芽六丁運神斧斲削如人家四牖
遺古制玲瓏吐雲霞側聞劉樊徒于此鍊丹砂耕烟種
青櫺結實大如瓜揮手謝衆士身登鳳凰車至今石窗
底青天守龍蛇玉女四五人綠鬢垂髣髴時來聽潺湲
意態靜不譁我夜闌其旁月黑星如麻顧慙無靈氣悵
望空咨嗟

姚江逸詩

宋詩紀事卷五十

欽定四庫全書

集部

宋詩紀事卷五十一

詳校官監察御史臣李陽枾

侍讀臣孫球覆勘

總校官進士臣繆琪

校對官中書臣牛稔文

謄錄監生臣許紹錦

欽定四庫全書

宋詩紀事卷五十一

錢塘厲鶚撰

張孝祥

孝祥字安國歷陽烏江人紹興二十四年廷試
第一孝宗朝累遷中書舍人直學士院領建康
留守尋以荆南湖北路安撫使請祠進顯謨閣
直學士致仕卒有于湖集

題定山寺

時年十六歲

蹇驢夜入定山寺古屋貯月松風清正聞挂塔一鈴語
不見撞鐘千指迎

題夏氏莊

平湖漠漠雨霏霏壓水人家燕子飛欲向湖東問春色
杏花無數點春衣

以上于湖殘棠

賀郊祀慶成

漢統千齡接虞衡七政齊德馨天自嚮容備古猶稽輿
衛鉤陳北衣冠觀闕西雨先清道蹕寒避禮神主方士

朝仙仗宮垣挾御隄廟芝楹疊壁帝樂字連奎虛次尤
祇慄懷親極慘悽珠旒依玉色蘭炬映璇題兩相初扶
翼崇壇六降濟高靈森欲墮諸福應如攜燎夜壇三燭
淩霜甲萬犀宗燔申寶酌祕檢護金泥奉引星辰爛旋
歸錦繡迷端門臨五鳳步輦駐雙霓日照雲裳委風含
綵篋低和聲翔四表嘉澤浸羣黎盛事真寥廓微生荷
獎提侍祠叨執爵著籍繆通閨異寵何其報孤忠誓不
睽裁詩獨愁晚猶得並鳬鷺

椰子酒榼

矮胡生南方託家碧山崖採擇供貢篚扶持上天街媿
此愿慙姿欲售久未諧道傍麴先生風味固自佳逢渠
即傾蓋輸寫能開懷刮削出光采規繩去敲窠金玉豈
足貴膠漆真吾儕客來有佳招二士往必偕婆娑止坐
隅供饋煩金釵矮胡雖木强醇德真無涯虛心實其腹
居然外形骸微物幸見用棄置理則乖毛穎有封國陶
匏薦裡柴大藥起世痾炮燔及根茲願子自洗濯勿受

塵埃薶暇日肯相從醉經坐高齋

舟行大雨戲作呈張立之及同行諸公

我船千斛初甚遲上灘下灘風薄之百夫撐挽纔得過
水淺舟大行無期同來賓客笑鈍滯一葉自買如鳬鷖
瞥波急槳亂藻荇瞬息不見颿車馳忽然昨夜雷雨作
墨雲頽山風卷壑龍門春漲魚鼈亂牛渚宵明鬼神惡
蓬翻纜斷泊不得客只一身無處著長年叫客強驚起
一浪先掀半船水囊衣漂盡到巾屨終夜奔茫沙石裏

我時酣寢殊不覺但怪颼颼風到耳起來呼酒自勞苦
水滿涼生差可喜向來笑者今卻悲人生淹迷那能知
明朝轉舵我船快喚客同船莫嫌隘

以上合璧事類外集

贈滕使君

千騎東方白玉鑣十眉環坐紫檀槽安南都護來鼇禁
建武將軍握豹韜瘴雨蠻煙驚鼓角朔雲邊雪滿旌旄
夕烽不到甘泉殿尺一徵還近赭袍

贈甘法曹

北岳仙人汗漫遊斯文曾到海邊州誰憐詩禮甘公子

牢落青衫到白頭

以上合璧事類後集

可賦軒

在西湖寶林院

光明獵獵上烏巾不那西湖爛漫春借我繩牀對脩竹

為君一洗輭紅塵

咸淳臨安志

東坡

繫船著西日曳杖到東坡暗井蛙成部荒祠鳥作窠老

仙騎鶴去稚子飯牛歌興廢何須問斯文自不磨

方輿勝覽

玉淵亭

靈源直上與天通
借路來從五老峯
試向闌干敲拄杖
為君喚起玉淵龍

方輿勝覽亭在廬山棲賢寺門外澗中白石不以數計如臥羊故曰玉淵張安國書二字仍作詩

萬杉寺

老幹參天一萬株
廬山佳處著浮圖
祇今買斷山中景
破費神龍百斛珠

程史王阮偕張紫微遊廬山萬杉寺紫微大書
二章阮憮然曰先生氣吞虹霓今少卑之何也
別去兩旬而得湖陰之訃紫微于此絕筆

題蔡濟所摹御府米帖

生前官職但執戟身後一字萬金直當時雷電下收拾
世間不復有遺逸整整十卷字尤溼光采激射海為立
平生我亦有書癖對此懍懍心若失口呿汗下屢太息
十日把玩不得食作賤天公拜稽首乞我此老生時一
雙手為君痛飲百斛酒墨池如江筆如帚一掃萬字不

停肘

後村詩話

浯溪中興頌

在永州祁陽縣

繡紉兒啼思塞酥重牀燎香驅羣胡黃帟錦韞無尋處
一夜驚眠搖帳柱朔方天子神為謀三郎歸來長慶樓
樓前拜舞作奇崇中興之功不贖罪日光玉潔十丈碑
蛟龍盤拏與天齊北望神京淚雙落只今何人老文學

浯溪集

元風洞

在桂林七星山陰風襲人凜如冰雪

山入烏蠻連越雋天開斗野對珠宮應憐桂海長炎熱

乞與清涼萬竅風

桂林府志

張堅

堅鎮江人紹興二十四年進士

鶴廟松

聞采茯苓者傷其根遂枯其半

誰種飛仙百丈梯風摧雨折昔人非憑誰寄語楊員外

留取孫枝待令威

茅山志

虞允文

允文字彬甫隆州仁壽人紹興二十四年進士
累除中書舍人直學士院被命犒師立功采石
乾道中歷左丞相同中書門下平章事兼樞密
使封雍國公以少保宣撫四川卒贈太傅諡忠
肅有集

鶚按咸淳臨安志紹興二十四年張孝
祥榜無二十三年榜宋史誤也今訂正

過瀘江亭

映水林巒影顛倒濟川舟楫勢崢嶸東行萬里欲乘興
更待一篙春水生

全蜀藝文志

錢良臣

良臣字友魏華亭人紹興二十四年進士孝宗朝拜參知政事罷知鎮江

顧野王讀書堆

伊昔邊烽備不虞太平移作梵王居而今江表全無事

借我三椽更讀書

松江府志

梁安世

安世字次張括蒼人紹興二十四年進士淳熙

中桂林轉運使有遠堂集

石芥

擷根山石貯瓶罌桂後緘題見者頽風味莫嫌無醞藉
杯棹也解作聰明願言噴嚏傳心事搔首躊躇散宿醒
最是徂徠明道地至今姦膽亦魂驚

蘆浦筆記

秦碑一紙并古詩呈王梅溪太守

公生博物好奇古勸我搜求秦望碑我來稽陰且三載
夢寐絕頂雲俱馳事非近代問父老鼻祖已來猶不知

或云其山多虎狼困湫罅井蟠蛟螭魍魎木客忌人到
陰霾賊霧迷羊歧樵夫懸磴懼失勢一落萬丈誰能支
吾意此如鍾乳穴民昔畏擾相譸欺曩時山東之罌石
磑硨入海無津涯固知秦人游戲餘非民之利寧一時
暇日登臨雲門寺僧曰若耶溪上奇山曰何山勢最峻
丹鶴夜宿天孫枝南望天台西錢唐下視峯岫如羣兒
李斯篆書真刻本昔人避亂此見之裹糧遂偕墨工往
扳崖貫木如鹿麋舉觴酌酒山之神千古呵護煩神司

銷鑠僅存三尺許龜趺就鑿山石為剜苔剔蘚隨手剥
面節背角摧霜皮老龍脫甲蛇解蛻鋪紙拭墨漫披離
收藏入袖恍若失遐想往昔還嗟咨我聞太古功德盛
鋪寫不盡乾坤儀詩書紙上自不朽金石還有磨滅期
秦皇不慕仁義業直謂堯舜猶瑕疵焚書欲蓋前代美
寧聞伏生傳有頤後生不廢丞相書歌頌雖在皆浮辭
惜哉此紙無一畫欲記存亡人應嗤他年好事繼追訪

姑願首尾觀吾詩

雲門集

雙溪

春霖漲合兩溪平
雪浪中浮桑柘青
南市喚船撐未到

一番簑笠滿津亭

金華府志

句

蕃馬步銜青首
宿羌兒臥唱白銅鞮

吹劍錄

何異

異字同叔號月湖
崇仁人紹興二十四年進士

累擢監察御史遷右正言
寧宗朝歷刑部侍郎

權工部尚書以寶謨閣學士致仕

一犁春雨圖

負郭先疇二頃餘飽看雨後著耕夫輓紅塵裏家山夢

卻就君家閱畫圖

詩家鼎鑪

題李國博東園

東園吟思玉蟾清園客開門古意生冰硯雲燈深洞宇
春花秋草舊宮城人藏密樹尋聲見鷺下寒池照影驚
三十分司泉石主馬蹄塵外得聞名

章少機建小閣用陳伯強韻

樓居草草假三間便覺星辰手可攀
最喜坐中先得月不妨睡處也看山
林疎啼鳥秋彈曲天濶飛鴻曉捲班
對鏡清吟無限好典衣舊債幾時還

以上瀛奎律髓

句

天近風轉清地高日難晚

賓退錄何月湖尚書少時登高峯壇有句云云
林黃中侍郎見之即知其異日必貴且壽

范端臣

端臣字元卿蘭溪人浚從子紹興二十四年進士累官中書舍人右史有文集

題小三洞石磴

短策將我影照盡山前溪
黃緣入風磴歷覽窮攀躋
不須翦梧桐自倚青冥梯

金華府志

范成大

琉璃河

又名劉李河在涿州北三十里極清洌茂林環之尤多鴛鴦千百為羣

烟林蔥蒨帶回塘
橋眼驚人失睡鄉
健起褰帷揩病眼

琉璃河上看鴛鴦

此河大中祥符間路振乘輅錄亦謂琉璃河惟嘉祐中宋敏求入番錄乃

謂之六里河

灰洞

在涿北燕南之間兩旁皆高岡無風而路極狹塵土全積咫尺不辨人物

塞北風沙漲帽簷路經灰洞十分添據鞍莫問塵多少
馬耳冥濛不見興

會同館

燕山客館也授館之明日守吏微言有議留使人者

萬里孤臣致命秋此身何止一漚浮提攜漢節同生死
休問羝羊解乳不遼人館本朝使已謂之會同館

挽王提刑彥光

喻蜀三年戍還吳萬里船雲歸雙節後雪白短檠前百
世春秋傳一壚陽羨田浮生如此了何必更淩煙
日者悲離索公乎又杳冥門人辨韓集子舍得韋經此
去念築室空來聞過庭路遙人不見千古泣松銘

中吳紀聞王葆字彥光崑山人擢宣和甲辰第
紹興中除監察御史出知漢州移浙東提刑歸
鄉卒其學長于春秋著集傳十五卷備論兩卷
姪彥嘉登第彥光監裁甚精今參政周公初登
第愛其博洽納之為壻尋即榮遇參政范公挽
詩云

丁酉重九藥市呈坐客

莫向登臨怨落暉
自緣羈宦阻歸期
年來厭把三邊酒
此去休哦萬里詩
烏帽不辭敲短髮
黃花終是欠東籬
若無合坐揮毫健
誰嗣西風楚客悲

以上石湖詩集

澄懷錄范石湖云淳熙己亥重九與客自閭門
汎舟徑橫塘宿霧一白垂垂欲雨至綵雲橋氛
翳豁然晴日滿空風景閒美無不與人意會四
郊刈熟露積如繚垣田家婦子著新衣畧有節
物挂帆邈越來溪潦收淵澄如行玻璃地上菱
花雖瘦尚可采擷樣權石湖扣柴荆坐千巖觀
下菊叢中大金錢一種已爛漫穠香正午薰入
酒杯不待轟飲已有醉意其傍丹桂二畝皆盛

開多樂枝芳氣尤不可耐攜壺度石梁登姑蘇
後臺躋攀勇往謝去巾輿筇杖石稜草滑皆若
飛步山頂正平有坳堂蘚石可列坐相傳為吳
故宮閒臺別館所在其前湖光接松陵獨見孤
塔之共少北墨點一螺為崑山其後西山競秀
縈青叢碧與洞庭林屋相賓大約目力踰百里
具登高臨遠之勝始余使金是日過燕山館嘗
賦水調首句云萬里漢家使後每自和桂林云
萬里漢都護成都云萬里橋邊客明年徘徊樂
市中頗歎倦遊不復再賦但有詩云云今年辛
甚獲歸故園偕鄰曲二三子醺酢佳節于鄉山
之上乃復用舊韻首句云萬里吳船泊歸訪菊
籬秋

致爽軒

在永康軍

夕陽塵外漲郊墟六六峯頭夢覺餘竹色喚人來下馬
亂蟬深處有圖書

方輿勝覽

馬大同

大同字會叔嚴州人紹興二十四年進士歷官

戶部侍郎

提刑少卿嚴陵馬大同以職事循行過九疑謁舜
祠下而祠宇圯甚顧瞻慨歎乃留錢百千屬邑尉
鄒安道為之繕葺因賦小詩聊序一時之勝云淳

熙癸卯冬至前一日

帝德于今祀萬年如何遺像託疎椽憑誰為假丹青手

付與梅仙十萬錢

九疑山志

甄龍友

龍友字雲卿永嘉人遷樂清紹興二十四年進

士官至國子監簿

觀洞庭

風定澄空氣渾然恍疑太極未分前祇因有浪知為水

若遇無風即是天舊說君山張帝樂新聞老木識飛仙
而今大洞黃庭客又看題詩紀歲年

東甌詩集

徐夢莘

夢莘字商老臨江人紹興二十四年進士紹熙
中為荊湖北路安撫司參議官著三朝北盟會

編除直秘閣

江西鄉人同仕廣右者十有二

李蹊成叔郭有憑
允誠潘脩文叔李

石韞玉徐夢莘商老王璟李文張坦明仲蔡誦子
羽陳公璟師宋魏沐董父王思詠詠之孟浩養正

淳熙重光赤奮若仲秋中澣講鄉會于湘南樓過
彈子崑

吾儕生江南遠近且鄰鄉一官皆為貧餬口走四方遇
合良獨難動如參與商誰知自有時朋盍聚炎荒外臺
參計畫幕府佐紀綱出宰得壯縣司教涖郡庠曹掾勝
三語簿領真仇香不止似人喜頓覺吾輩張合坐尊序
齒避席敬行觴崑洞縱登覽杖屨倍徜徉慕矢以相娛
嘯歌情意長舉酒起祝規愛我樂石良古人尚植立君

子道其常平生學忠孝餘力從文章臨節不可奪當官
有何強窮乃見節義老當志彌剛鴻鵠在寥廓騏驎終
騰驤願言各勉旃富貴無相忘

桂勝

楊萬里

萬里字廷秀吉水人紹興二十四年進士光宗
朝歷祕書監出為江東轉運副使再召皆辭寧
宗朝以寶謨閣學士致仕卒諡文節有誠齋集

周益公題跋誠齋大篇短章七步而成一字不
改皆掃千軍倒三峽穿天心透月脇之語至于

狀物姿態寫人情意則鋪叙纖悉曲盡其妙筆端有口句中有眼

困學紀聞識齋讀貞觀政要云拔士新豐逆旅中懷賢鳴綠水波東酒傾一斗薦肩客醋設三杯羊鼻公羊鼻公謂魏鄭公見龍城錄

觀太平寺畫水長句

太平古寺劫灰餘夕陽惟照一塔孤得得來看還不樂
竹莖荒處破殿虛偶逢老僧聽僧話道是壁間留古畫
徐生絕筆今百年祖師相傳妙天下壁如雪色一丈許
徐生畫水纔盈堵橫看側看只麼是分明是畫不是水

中有清濟一線波橫貫萬里濁浪之黃河雷奔電卷儘
渠猛獨清元自不隨他波痕盡處忽掀怒攪動一河秋
水暮分明是水不是畫老眼向來元自誤佛廬化作金
柁樓銀山雪堆風打頭是身飄然在中流奪得太一蓮
葉舟僧言此畫難再覓官歸江西卻相憶井州剪刀剪
不得鵝溪匹絹官莫惜貌取秋濤懸坐側

費蓁梁溪漫志吾州太平寺郡人徐友畫清濟
貫河一筆紆遶長數十丈不斷卻立而觀濤瀾
洶湧目為之眩仰首近之凜然若飛流之幾于
面也楊誠齋為太守為賦長句

游豐湖

三處西湖一色秋
錢塘潁水更羅浮
東坡元是西湖長
不到羅浮便得休

梁溪漫志杭潁皆有西湖東坡連鎮二州故表謝云入參兩禁每玷北扉之榮出典二邦輒為西湖之長晚謫惠州州有豐湖亦名西湖淳熙中楊祕監使廣東過之賦詩云云

寄陸放翁

君居東浙我江西
鏡裏新添幾縷絲
花落六回疎信息
月明千里兩相思
不應李杜翻鯨海
更羨夔龍集鳳池

道是樊川輕薄殺猶將萬戶比千詩

鶴林玉露放翁晚年為韓平原作南園記除從官楊誠齋寄詩云云蓋切磋之也然南園記唯勉以忠獻之事業實無諛辭

題牧牛亭秦太師墓

函關只有一穰侯瀛館寧無再帝丘天極八重心未死

台星三點圻方休只看壁後新亭策恐作移中屬國羞

今日牛羊上丘壟不知丞相更瞋不

自注秦暮年起大獄必殺張德遠胡

邦衡等五十餘人不知諸公殺盡將欲何為奏垂上而卒故有新亭之句然初節似蘇子卿而晚謬

程史金陵牧牛亭秦氏之邱隴在馬楊誠齋嘗
題詩壁間云云檜墓前隊碑宸翰在焉有其額
而無其辭臥一石草間曰當時將以求文莫之
肯為檜在金蓮蘭縱之逃歸不知何以似子卿
也

明發南屏

新晴在在野花香過雨迢迢沙路長兩度立朝今結局
一生行客老還鄉猶嫌數騎傳書札賸喜千峯入肺腸
到得前頭上船處莫將白髮照滄浪

以上誠齋集

鶴林玉露孝宗朝誠齋為祕書監論高宗配享
出守高安其去國時詩云云可謂無幾微見于

顏面矣

過楚州淮陰侯廟

鴻溝祗道萬夫雄
雲夢何銷武士功
九死不分天下鼎
一生還負室前鐘
古來犬斃愁無蓋
此後禽空悔作弓
兵火荒餘非舊廟
三間破屋兩株松

程史音節悲壯倫擬抑揚偏壁間殆無繼者

惠迪

迪字楸吉宜興人紹興二十四年進士官大理

司直改國子博士

婆餅焦

夢破一聲婆餅焦
吳音未穩帶春嬌
不禁風力遙飛去

卻引餘音過別條

前賢小集拾遺

句

小屋牽蘿補高軒
偃蓋過

孫觀惠公墓誌云
林吉少時治一室讀書其中
予過賦小詩
林吉和荅云云
予讀之驚歎

王十朋

毛虞卿

十朋字龜齡樂清人紹興二十七年進士第一
孝宗朝累遷起居舍人侍御史改吏部侍郎歷
四郡守以龍圖閣學士致仕卒諡忠文有梅溪
集

劉珙序云公平居無所嗜好顧喜為詩渾厚質
直懇惻條暢如其為人

會稽秦頌德碑丞相李斯篆世傳在秦望山莫知
所在教授莫君好奇嗜古搜訪尤力有言碑在何
山者莫以語某何山見于圖經在秦望東南疑其

真秦望也某欣然欲往職有所拘以告會稽梁尉
慨然而行登山果見之碑石僅存字磨滅已盡墨
片紙而還作古風長韻具記始末因次其韻且記
吾三人好事之癖亦以示後人也

姬嬴遺蹟存者稀世傳石鼓稽山碑石鼓揄揚得韓子
文與二雅爭驅馳秦碑誇大頌功德埋沒草莽無人知
或言山頂石猶在上有虎豹龍蛇螭神藏鬼護荆棘蔽
崖懸磴絕登無岐廣文好奇探禹穴梅仙好事尋僧支

我贊其行要親覩勿受世俗流傳欺望秦秦望兩嶄絕
何山壁立東南涯豐碑屹植最高處不知磨滅從何時
剔苔掃墨了無有模糊片紙亦足奇濃雲霽黯將雨
古木槎枒蟠老枝歸來走筆出險語訶叱政斯同小兒
詩成得得寫寄我辭嚴意偉法退之我聞秦人滅六國
酷若犬磔臨海廢先王法為秦所負負秦況有秦有司
五經灰飛儒濺血堯舜周孔何能為上蔡獵師妙小篆
奴視俗體徒肥皮東封泰山南入越犬書深刻光陸離

沙邱風腥人事變鬼飢族赤誰嗟咨漢興萬事一掃去
惟有篆刻餘刑儀磨厓欲作不朽計其如歷數不及期
蚩尤五兵闕漆器人物美惡能相疵我雖過秦愛遺畫
南山入望頻支頤不須嶧陽訪棗刻不用史遷觀雄辭
虛堂默坐對此紙閉眼暗想君勿嗤要知秦碑沒字本
卻類周雅無辭詩

悼張安國舍人

天上張公子少年觀國光高名一枝桂遺愛六州棠出

世纔成佛修文遽作郎長沙屈賈誼宣室竟淒涼

悼亡

燕寢焚香老病身細君相對坐如賓而今一榻維摩室
唯與無言法喜親

偕老相期未及期回頭人事已成非逢春尚擬風光轉
過眼忽驚花片飛

東屯

少陵別業古東屯一飯遺忠畎畝存我輩月叨官九斗

須知粒粒是君恩

方輿勝覽東屯有青苗陂杜詩云東屯稻田一百頃北有澗水通青苗晴浴狎鷗分處處雨隨神女下朝朝又云東屯復瀼西一種住青溪東屯之田可得百許頃稻米為蜀第一郡給諸官俸廩以高下為差紳漕月得九斗故王詩云云

初至泉州示七邑宰

九重天子愛民深
令尹宜懷惻隱心
今日黃堂一杯酒
使君端為庶民斟

十日同知宗提舶游九日山延福寺

十日同登九日山山中好處畧躋攀桑田改變松猶在
車馬往來僧自閑昨日風應吹紫帽今朝菊已帶衰顏
登臨稍愜南來意好逐飛飛倦鳥還

和韻題秦隱君系故居

山中高韻欲逃名不謂名隨隱處成鑿石一泓詩數首
也曾攻破五言城

夜聽雙瀑同劉方叔毛虞卿聯句

夜聽雙瀑喧遙聞疑雨來澗壑生清風襟宇捐纖埃

龜齡

飛鳴撼半空暗想飄瓊瑰前觀阻步屨側耳成徘徊虞卿
蕭然山館間此興何悠哉子晉不復見月白空簫臺方叔

以上梅溪集

王孝子詩

臣子大節孝與忠父母仇讐天下同賢哉會稽王孝子
感慨有古烈士風松楸一夕盜破冢親獲鼠輩聞之公
有司守法貸其命孝子銜恨無終窮誰謂書生膽如許
貌若尪羸中甚武手斬凶人提髑髏請死伸冤詣公府

君不見齊襄內行世所羞春秋賢之緣復讐又不見子
胥鞭屍報父怨太史為之作佳傳君今枕戈志已伸更
須移孝為忠臣他年當作傅介子誓斬樓蘭雪國耻

梅磻詩話王公衮吉老會稽山陰人紹興甲戌
登進士第仕至左司郎中盜劫其母墓成獄盜
不死吉老手殺之詣州自言兄宣子請納所居
官以贖其罪時梅溪王公十朋為簽幕賦詩以
美之

吳已正

已正溫州人

句

舉頭不忍看王十回面猶欣見李三

二老堂詩話紹興二十七年御筵進士四百二十六人溫州王十朋為之首其鄉人吳已正綴末特奏狀元之後則福州李三英例賜出身附名正奏之後已正有詩云云

何德獻

德獻官饒州提點

送王龜齡自饒州遷夔州饒人遮道挽留公易轎

由間道而去

斷橋截鐙亦堪憐始信林間別有天微見兵機第一義

朱輜暫席廣文壇

梅溪文集附

趙十朋

十朋台之黃巖人紹興間隱士

絕句

四枚豚犬教知書二頃良田儘有餘魯酒三杯棊一局
客來渾不問親疎

見王梅溪集後梅溪和之云薄有田園種斗升
兩兒傳授讀書燈客來一局三杯酒王十朋如

趙十朋

卷五十一

姜大呂

大呂字渭叟王梅溪之友

懷王龜齡

左原消息杳無聞令我愁懷似亂雲
多病廢詩兼廢酒
青春孤我亦孤君要同學問文章樂
無奈東西南北分
況是一簷殘雨後落花飛絮兩紛紛

王梅溪集附

劉鎮

鎮字方叔紹興間人登戊辰科與王梅溪十朋
游有待評集梅溪為序今不傳

書王龜齡述恨詩後

山北山南春雨足漠漠柔柔秀如沃儂家荆婦幾時歸

西疇獨自驅黃犢

王詩有剝栽桑柘教妻蠶之句

梅

溪集附

唐立夫

以日者命狀寄王龜齡

試把流年子細看休將蠖屈比鵬搏渠家大有回天力

不易區區作好官

王梅溪集附

孫皜

皜字子尚開封人紹興間家于會稽與王十朋

友善

往浙西別王龜齡

中原回首尚胡塵世事徒驚日月新
羈旅不堪頻作別壯懷雖在已甘貧
南來求友傳三益西去論心有幾人
別後夢魂何處是祇應來往慎江濱

王梅溪文集附

王 柜

柜字嘉叟安中孫寓居泉南紹興間官至刑部侍郎

題王龜齡詹事祠堂

當時孤論偶相同終始知心每媿公
纔見安車延綺季遽嗟石室祀文翁
百年公議分明在一餉紛華究竟空

白髮舊交衰甚矣尚能留面對高風

自注始予與龜齡別嘗謂吾輩會合

不可常但令常留面目異時可復相見龜齡再三擊節後一見必誦此言 貴耳集

句

柳色知春淺鐘聲覺寺深
避虎連村靜分魚一市腥

後村詩話

聞人符

符嘉興人紹興二十七年進士餘杭尉

題清習閣

清曉捲書坐開簾揖遠峯
膩雲留宿潤膏雨沐春容
世味生來薄詩愁晚更濃
溪山看未足還聽暮樓鐘

咸淳
臨安

志

劉清之

清之字子澄臨江人紹興二十七年進士累官
知衡州

洞霄宮

高山鎖斷紅塵路石柱干霄藏洞府老蛟據窟不可窺
千古流泉替渠舞真墟容我輒躋扳心曠方知白日閑
飛仙一去忽已遠坐對松梢雲往還

洞霄詩集

洞庭湖

天孫歲晚會湘靈
倒瀉銀河合洞庭
上下天光唯一白
中間山色不多青
荆潭萬里收塵滓
宇宙連宵失晦明
莫道人間少仙境
詩思酒魄一時醒

岳陽紀勝

遊洪陽洞

朝來拔腳塵埃底
共訪人間小有天
喚醒幾年朱墨夢
胸中邱壑故依然

李南金

南金字晉卿自號三谿冰雪翁樂平人紹興二

十七年進士光化軍教授

江頭吟

兒時盛氣高于山不信壯士有飢寒如今一杯零落酒
風雨蝕盡征袍單側立崑奴面鐵色楚客不言未吹笛
關山有月無人聲自是江頭渚花發渚花春少未得妍
凝立青山圍水天杜鵑故態不識事盡情呌入青楓煙
壯士未握邊頭槊旄頭如月幾時落如今世界不愛賢

看取清風白雲角鳴呼一歌兮歌已怨壺中無酒可續
嚙

鶴林玉露云詞旨清婉可愛

茶聲

砌蟲唧唧萬蟬催忽有千車捆載來聽得松風并澗水
急呼縹色綠瓷杯

登第後畫師以冠裳寫真戲題

落魄江湖十二年布衫濶袖裹風煙如今各樣新裝束

典卻清狂賣卻顛

鶴林玉露云一時戲語亦自有味

喻良能

良能義烏人紹興二十七年進士補廣德尉累
遷工部郎官出知處州奉祠歸卒有香山集

秋曉野步

幽居邇郊原出戶目已瞭閑攜一枝竹散步及秋曉寒
煙引輕素澹澹縈木杪矯首矚層穹轉盼失飛鳥野潦

淨荒陂驚颿泛枯篠世態徒營營此心殊了了佳處誰
與論聊用付清醪

三月二十四日再朝永祐陵

扁舟投曉出重城春浪初肥綠滿汀竹裏幾聲泥滑滑
河邊十里草青青人家桃葉驚飛燕水面楊花入翠萍
漸近昭陵佳氣集五雲松柏喜重經

以上義烏縣志

謝諤

諤字昌國臨江軍新喻人紹興二十七年進士

孝宗朝累官監察御史光宗朝除御史中丞權
工部尚書請祠歸卒初居縣南竹坡名其燕坐
曰艮齋人稱艮齋先生

清常寺

佛廬塵不到客枕夢頻驚
浙浙山風響纖纖隙月明
煙雲春漸暖鐘磬曉逾清
蹤跡奔馳裏飄浮媿此生

鰲溪

數板小橋橫晚晴兩行古木弄春榮
不知多少夜來雨

水到岸頭渾欲平

玉山觀

微明燈火夜堂幽聽徹絲桐萬慮休骨冷魂清眠不得

竹風蕭瑟滿庭秋

以上撫州府志

沈清臣

清臣字正卿鹽官人紹興二十七年進士上書

貶封州放還終祕閣修撰有晦巖集

遊道場山

松篁十里綠成谿短短籃輿入翠微回首青山已陳迹

隴頭猶見白雲飛

湖州府志

京 鎧

鎧字仲遠豫章人紹興二十七年進士寧宗朝
拜左丞相卒贈太保諡莊定有松坡集

曹操疑冢

疑冢多留七十餘謀身自謂永無虞不知三馬同槽夢
曾為兒孫遠慮無

中州題詠集

吳儆

儆字益恭初名偁避秀邸諱改名紹興二十七年第進士歷朝散郎廣南西路安撫使主管台州崇道觀卒諡文肅有竹洲集

汪叔耕見訪不數日別去惡語為贈兼簡子用子美二友

負轡得老窮埽軌事幽屏楚然羅雀門有客頽而整悲歡十年別尊酒清夜永妙句時驚人盈軸肯傾廩三日

語未休霜寒夢歸省臨流分別袂波光照孤影重念吾
故人雪屋青燈冷天晴風日佳何日過甌徑石鼎然豆
其冰蘊煮湯餅

寓郡城客舍熱不可寐與程彥舉坐語達旦

淡月微雲對倚樓無聲河漢自西流高城忽起梅花弄
散作晴空萬里秋

以上竹洲集

梁克家

克家字叔子晉江人紹興三十年進士第一累

遷中書舍人孝宗朝拜右丞相封儀國公卒贈

少師諡文靖知福州時嘗修三山志

賦九月梅花

老菊枯殘九月霜誰將先煖入東堂不因造物于人厚
肯放南枝特地香九鼎燮調端有待百花羞澀敢言芳
看來冰玉輝相應好取龍吟播樂章

梅磎詩話梁鄭公克家未第時為潮州揭陽宰
館客寓縣治東齋齋前有梅一株忽于九月中
盛開嶺外梅著花固早于江浙間必至冬方有
之邑人殊以為異邑士多賦詩往往誚令君梁

公亦賦一篇云云明年廷對魁天下孝宗朝拜相

次陳休應烹茗廓然亭見送韻

已行更為玉泉留好景煩公傑句收紫帽峯前雙鷺下

幾多清興滿滄洲

南安縣志

沈瀛

瀛字子壽湖州人號竹齋紹興三十年進士

葉水心云子壽少入太學仕宦四十餘年絀于王官再入郡三佐帥幕其生平業嗜文字若性命在身非外物也

石人

在德清縣南戴巷邑人呼為石人頭

檢點行程歲歲同石人頭畔且從容向來奉口溪邊月

此夜乾元寺裏鐘

湖州府志

王質

質字景文號雪山鄆州人寓居興國軍紹興三

十年進士孝宗朝為樞密院編修官出判荆南

府奉祠山居有雪山集紹陶集

何處難忘酒

何處難忘酒英雄太屈蟠時違聊置菴運至即登壇梁
甫吟聲苦干將寶氣寒此時無一盞拍碎玉闌干

貴耳集

東流道中

山高樹多日出遲食時霧露且霏霏馬蹏已踏兩郵舍
人家漸開雙竹扉冬青市地野蜂亂蕎麥滿園山雀飛
明朝大江載吾去萬里天風吹客衣

瀛奎律髓

居句曲山辭

通明

林屋兮峨嵋岱宗羅浮兮繚之幅員既長兮無極杳煙

壑兮雲陂谷高雲深兮矧昭陽穹廬之翻覆萬春秋
兮句曲東麓兮南岡桂椒蕭艾兮同香湛汧溪兮永碧
岌茵山兮長蒼

紹陶錄

蓋經

經字德常華亭人紹興三十年進士官戶部侍郎

游大滌洞天

暇日尋幽入洞霄攀蘿捫石自忘勞地環九鎖仙都閤

山倚一峯天柱高夜靜仙人吹鳳笛月明帝子下雲旄
佩環寂寂中庭曉時有胎禽唳九臯

洞霄詩集

王信

信字誠之處州麗水人紹興三十年進士孝宗
朝歷官中書舍人給事中出知紹興府有是齋
集

詠揚州后土祠瓊花

愛奇造物翦瓊瑰為鎮靈祠特地栽事紀揚州千古勝

名傳天下萬花魁何人折卻依然在是處移將不肯開
謾說八仙模樣似八仙那得有香來

處州府志

高文虎

文虎字炳如餘姚人紹興三十年進士寧宗朝
歷中書舍人翰林學士

集高亭

山亭十月晏溫朝倚檻一聲婆餅焦古澀力微寒氣早
不成清亮卻成嬌

入剡詠桂花

溶溶漠漠秋光澹耿耿寥寥夜色清不是靈根涵爽氣
如何醞得此香成

以上剡錄

林外

外字豈塵晉江人紹興三十年進士官興化令
有嬾窠類稿

題西湖酒家壁

藥爐丹竈舊生涯白雲深處是吾家江城戀酒不歸去

老卻碧桃無限花

齊東野語林外詞翰滿爽詆諆不羈飲酒無算
在上庠暇日獨遊西湖幽寂處得小旗亭飲焉
外美風姿角巾羽氅飄飄然神仙中人也豫市
虎皮錢篋數枚藏腰間每出其一入酒家保傾
倒使視其數酬酒直即藏去酒且盡復出一篋
傾倒如初逮暮所飲幾斗餘不醉而篋中錢若
循環無窮者肆人皆驚異之都下甚傳其酒家
肆有神仙至云

曰璐按庚溪詩話亦載此詩以為必神仙語不
知為外詩也陶宗儀又以為龍川藍喬作只數
字不同西溪叢話則以為終南作磐監青州酒
稅題酒樓所作一詩互異如此

向豐之

豐之向後裔

句

人情甚似吳江冷世路真如蜀道難

湖海新聞豐之才調極高貧窘則甚有句云云
誠齋楊少監奇之

胡澄

和葉樞相芍藥

鷓鴣一聲春已歸蜨蜂無計戀花時
筆頭挽得春光住

卻是先生芍藥詩

四朝詩

鍾炤之

炤之字彥昭樂平人

句

霖作商巖雨薰來舜殿風

夷堅志鍾炤之長于詞賦紹興己卯春夜讀書窗下聞有哦句于外云云至秋試以膏澤為豐年詩鍾押豐字韻用此兩句入第五聯考官稱歎竟置高第

謝處厚

紀事

誰把杭州曲子謳
荷花十里桂三秋
那知卉木無情物
牽動長江萬里愁

劉一清錢塘遺事孫何帥錢唐柳耆卿作望海
潮詞贈之有三秋桂子十里荷花之句此詞流
播金主亮聞之欣然起投鞭渡江之志謝處厚
詩云云予謂此詞雖牽動長江之愁然湖山之
清麗使士大夫流連于歌舞嬉游之樂遂忘中
原是則深可恨耳

林宋偉

宋偉字力叟號橘園

題忠毅姚公廟

赤心許國自平時見敵捐軀更不疑權忌臯庸皆遁走

同時死難只青獅

青獅乃姚馬名每親飼之若通其語言時取斗酒投大盆中與馬同飲曰

吾與汝同力報國竟與馬同死

農父犁田出寶刀銅花浸血冷侵毛神鋒凜凜衝星斗

未許豐城劍氣高

耕者得姚所用大刀重六十斤

歲歲烝嘗九月期西風笳鼓萬人悲山邊走馬神旗閃

遙望君侯復下來

軍民每當重九侯生日集祠下祭酹往往見飛騎來遶山謂太尉來降

兩日經行舊戰場卻來祠下謁堂堂偷生諸將今何在

萬古英靈獨耿光

梅磳詩話紹興辛巳之冬金主亮傾國入寇如
林之族充塞淮甸尉子橋之戰大將王權先遁
統領姚興獨以所部四百騎當金六十萬自辰
至午凡十戰斃數百人全相謂曰使更數人如
此吾曹何可當權不遣一卒援部將戴皋亦玩
視不救興竟沒于陣朝廷憫其忠厚加恤典諡
以忠毅立廟淮甸迨今血食橘園林宋偉力叟
題四絕于廟

婁乾德

潺湲閣

在袁州仰山廟右廡下

一派冷冷遶檻清塵襟洗滌自涼生夜深好夢纔驚破

疑是半天風雨聲

方輿勝覽

鄒杞

杞廬山人

游洞霄宮

天柱古名山形勢友列嶽
神人巢其巔咳唾半天落
白晝見雲旗清夜聞笙鶴
花源或流虹仙禽猶擣藥
長歌不可見清風灑寥廓

洞霄詩集

冠元德

登岳陽樓

城頭雲氣壓層樓
城下江聲送客舟
天岳一峯青卓玉
洞庭千頃遠涵秋
繁華今古饒中土
形勢東南有此州
我欲浮家凌浩渺
不妨吟釣伴沙鷗

岳陽樓詩集

劉度

度紹興中祕書省校書郎

挽郭彥鄒

孝友追前輩
雍容具典刑
人榮老萊服
天隕少微星
玉

潤聯三傑金籀擅一經平生墊巾操不媿伯恭銘

石洞遺芳

集

陳良祐

良祐紹興中樞密院編修官

挽郭文彥鄒

誰起相如疾空悲武子亡平生有高志屬意在諸郎夢

斷駒過隙風高雁折行莫陪千乘送妙選媿東牀

石洞遺芳

集

左璵

璵字次琰黃巖人緯子紹興中特科

題馬世功谿野堂

歡言赴幽期作意理烟艇
曳纜松篁陰未覺心地迴捨
舟登爽塏微步水雲淨扶輿
登斯堂遐眺方一騁開軒
納野色秋思浩千頃心隨片
雲遠目送孤鴻影坐久襟
宇寬萬事詎容省永願陪清
游棲身白鷗境

黃巖英氣

馮楫

楫字濟川紹興中知邛州龍門遠禪師法嗣

自詠

公事餘閑喜坐禪少曾將脇到牀眠雖然現出宰官相

長老之名四海傳

五燈會元

陸升之

升之山陰人

皇后閣春帖子

內仗朝初退朝曦滿翠屏硯池渾不凍端為寫蘭亭

桑世昌蘭亭考憲聖慈烈吳太后居中宮時嘗
臨蘭亭山陰陸升之代劉珙春帖子云云刻石
吳琚家

王 嵎

嵎字季夷北海人紹淳間名士寓居吳興陸務
觀與之厚善有北海集

登更好堂同景思少卿表丈韻

萬里同行一瘦筇撥雲問水有先容更窮天姥投南路
已過台山第幾重自此又隨雙澗月何妨曾聽五峯鐘

卻從更好堂前望滿眼詩材思不供

吳興藝文補



宋詩紀事卷五十一